

## DOMINGU XIX TEMPU KOMÚN – TINAN C

### Tema

Maromak nia Liafuan ne'ebé liturjia ohin propoin mai ita konvida ba vijilánsia: eskolante loos la dobra liman de'it, iha ezisténsia ida komodizmu no rezignasaun nian, maibé matan-moris nafatin no disponivel atu simu Na'i, rona ninia apelu sira no harii "Reinu".

*Leitura dahuluk* apresenta mai ita liafuan "ema matenek" anónimu ida, iha-ne'ebé atitude ba valór sira Maromak nian mak fó moris no ksolok. Komunidade israelita – hodi konfronta an ho mundu pagaun no imorál, ne'ebé la simu valór sira ne'ebé harii komunidade Maromak nia Povu nian – tenke sai komunidade "vijilante" ida, ne'ebé konsege dixerne entre valór efémeru sira no valór duradouru sira.

*Leitura daruak* apresenta Abraaun no Sara, modelu fiar nian ba fiar-na'in sira tempu hotu nian. Matan moris ba Maromak nia apelu, sira konsege deskobre soin futuru iha limitasaun no fragilidade vida presente nian. Ida-ne'e mak atitude ne'ebé autór Surat ba Ebreu sira rekomenda ba fiar-a'in sira, ho modu jerál.

*Evanjellu* apresenta katekeze ida kona-ba vijilánsia. Nia propoin ba eskolante sira tempu hotu nian atitude ida hein nian iha hakmatek no matan moris ba Na'i, ne'ebé mai hasoru ita atu liberta ita no hatama ita iha dinámika ida komuñau nian ho Maromak. Eskolante loos mak ida-ne'ebé nafatin prepara an atu simu Maromak nia don sira, atu hatán ba ninia apelu sira no haka'as an iha kontrusaun "Reinu" nian.

### LEITURA I – Sab 18,6-9

"Livru Sabedouria" nian mak obra autór anónimu ida-nian, hakerek iha metade dahuluk sék. I mK, provavelmente iha Alexandria – sentru kulturál ida importante ba Diáspora judaika. Hodi dirije an ba judeu sira (ne'ebé moris iha ambiente ida idolatria no imoralidade nian), autór halo elojiu ida ba "sabadouria" israelita, atu anima israelita fiél sira no halo sira ne'ebé sees husi valór judaiku sira, fila ba dalan di'ak; hodi dirije an ba pagaun sira, autór (ne'ebé esprime an tuir mundu eléniku nia hanoin, nune'e nia mensajen bele to'o ba hotu) apresenta superioridade kultura no relijiaun israelita sira-nian, hodi ridikuliza ídolu sira no, ho modu implísitu konvida atu iha adezaun ba fiar judaika loos.

Testu ohin nian pertense ba parte datoluk livru nian (Sab 10,1-19,22). Iha-ne'ebá, hodi foti faktu konkretu no ezemplu figura sira husi istória, autór hahí "sabadouria" nia kmanek sira iha Maromak nia Povu nia istória. Iha kapitulu ikus sira parte datoluk nian (Sab 16-19), hodi hakat husi jerál ba partikulár, autór hatudu oinsá natureza rasik ne'ebé ema aat sira foti nu'udar maromak fila fali kontra sira, enkuantu ba Maromak nia Povu nia sai salvasaun ba sira... Senáriu reflesaun ne'e nian mak komparasaun entre buat ne'ebé loron ida akontese ba ema Ejitu sira (iha altura Ézodu nian) no buat ne'ebé, iha kontrapartida akontese ba Maromak nia Povu: peste animál sira-nian fó kastigu ba ema Ejitu sira, maibé manu-fuik sai ai-han ba israelita sira (kf. Sab 16,1-4); lalar no gafañotu sira estraga ema Ejitu sira, maibé samea halo ho riti ne'ebé Moisés hasa'e iha rai-fuik salva Povu (kf. Sab 16,5-15); udan no udan jelu nian estraga ema Ejitu nia ai-horis sira, maibé Maromak habosu nia Povu ho maná (kf. Sab 16,15-29); rai-nakukun halo ema Ejitu sira matan delek, maibé ahi koluna nian iha kalohan leno Maromak nia Povu iha nia dalan ba liberdade (kf. Sab 17,1-18,4); Ema Ejitu nia ona mane boot sira mate, maibé Maromak salva nia Povu nia moris (kf. Sab 18,5-25)...

## MENSAJEN

Ita-nia testu refere, ba kalan ne'ebé, ema Ejitu sira-nia oan mane-boot sira mate, kalan ézodu nian (kf. Ex 12,29-30). Autór interpreta kalan ne'e (kf. Sab 18,5) nu'udar "Maromak nia resposta" ba faraó nia dekretu atu oho ema ebreu nia oan-mane sira (kf. Ex 1,22). Ba ema Ejitu sira, ne'e mak kalan trájiku ida, ruína nian, mehi aat nian, destruisaun nian, mate no lutu nian; ba judeu sira, ne'e mak kalan salvasaun nian, glória no hahín nian ba Maromak libertadór. Iha autór nia perspetiva, Maromak la'ós de'it iha libertasaun nia orijen maibé, liuhusi Moisés, halo atu ebreu sira hatene antes akontesimentu sira kalan páskua nian (kf. Ex 12,21-28), atu sira hetan korajen. Buat ne'e hotu ba Povu mak Maromak nia hahalok.

Konfronta an ho Maromak nia atusaun ba nia Povu, Israel hetan forma oinsá hatán ba Jahwéh no manifesta louvór no agradesimentu: sakrifísiu sira, solidariedade, knanauk no inu sira, sira-ne'e mak Povu nia resposta ba Maromak nia asaun.

Konkluziun mak: ema Ejitu sira ne'ebé halo natureza sai maromak no halai tuir Maromak falsu sira – husik atu eskema sira opresaun no injustisa nian gia sira no simu husi Jahwéh kastigu loos, israelita sira, fiél ba Jahwéh no ba Lei, ne'ebé sempre hahí Maromak no agradese ba ninia di'ak hotu, haree Maromak atua hodi tulun sira no hetan liberdade no dame.

## LEITURA II – Heb 11,1-2.8-19

Surat ba Ebreu sira mak testu anónimu ida, hakerek iha tinan sira molok destruisaun Templu Jerusalém nian (tinan 70). Nia destinatáriu mak comunidade sarani sira (orijen judaika?) iha ne'ebé laran-luak tempu uluk nian sai menus no fó fatin ba kolen, baruk, dezinterese no tanba persegisaun sira no ema jentiu sira-nia inimizade, sira atu la'o ba kotuk fali husi sira-nia dalan sarani nian. Iha kontestu ida-ne'e, autór hakaran fó estímulo ba sarani sira, hodi hake'an sira-nia vokasuan sarani, to'o identifikasaun totál ho Kristu.

Surat – hodi uza linguajen teolojia judeu sira-nian – apresenta Kristu nia mistériu, amlulik boot liu, liuhusi Nia ema hotu hetan asesu livre ba Maromak no tama iha komuñauñ real no definitiva ho Nia. Autór aproveita, iha sekuénsia, atu reflète implikasaun sira husi faktu ne'e: tau iha relasaun ho Aman liuhusi Kristu/Amlulik, fiar-na'in sira tama iha Povu amlulik sira-nian katak, comunidade sarani no tenke halo sira-nia moris sakrifísiu kontínuu hahín nian, saran an nian, domin nian. Ho forma ne'e, autór oferese ba sarani sira aprofundimentu ida no dimensaun luan liután ba fiar uluk nian, ne'ebé sai fraku tanba persegisaun.

Testu ne'ebé ohin propoin mai ita tama iha parte dahaat surat nian (kf. Heb 11,1-12,13). Iha parte ne'e, autór insiste kona-ba aspetu báziku rua vida sarani nian: fiar no konstánsia eh perseveransa. Kona-ba fiar, autór konvida atu la'o tuir dalan "antigu sira-nian" (kf. Heb 11,1-40); kona-ba konstánsia, nia husu atu simu ho pasiénsia terus sira ne'ebé implika iha vida sarani, tanba terus sira-ne'e halo parte prova pedagójika sira husi Maromak atu ita to'o ba perfeisaun (kf. Heb 12,1-13).

## MENSAJEN

Fiar iha ne'e mak "garantia ba soim ne'ebé ita hein no serteza ba realidade sira ne'ebé ita la haree" (kf. Heb 11,1). Fiar, iha perspetiva ida-ne'e iha ligasaun ho esperansa; dirije ba futuro no ba invizível. Autór balun haree "garantia" ("hypóstasis") ne'e iha sentidu "konfiansa firme" (Lutero, Erasmo no autór seluk tempu ikus ne'e). Fiar iha perspetiva ne'e, mak konfiansa firme atu tama iha posesaun soim futuro sira, ne'ebé oras-ne'e la haree. Ne'e mak perspetiva diferente ida (maski komplementár) husi testu paulinu sira, iha ne'ebé fiar mak liuliu, adezaun ba Jezús – katak, iha relasaan pesoál entre fiar-na'in sira no Na'i.

Iha sekuénsia, autór apresenta galeria ida figura Testamentu Tuan nian ne'ebé, sai modelu fiar nian ba fiar-na'in hotu.

Testu apresenta mai ita figura Abraaun no Sara nian. Hodi fiar, Abraaun simu Maromak nia bolun, husik nia uma no bá iha rai ida nia la koñese no inkómodu; hodi fiar, Abraaun aseita atu estabelese iha rai la'ós ninian no horik iha ne'ebá; hodi fiar, Sara bele ko'us no tuur ahi Isaac, maski nia otas liu ona; hodi fiar, Abraaun la duvida bainhira Maromak haruka nia hasa'e nu'udar sakrifísiu iha foho aas ida, nia oan-mane Isaac, erdeiru promessa sira-nian no kontinuadór dexendénsia nian.... Abraaun la haree konkretiza promessa atu soi rai, la haree mós promessa povu sura-laek ida; maibé, hodi fiar, nia kontempla ho antisipasaun realizasaun promessa sira Maromak nian, "haree de'it husi dook". Nune'e, Abraaun asume ninia kondisaun la'o-rai no estrajeiru nian, hodi buka nafatin sidade futura, no la'o ba lalehan, ninia pátria definitiva. Ezemplu sira-ne'e mak autór propoin ba sarani sira moris iha persegisaun no iha dezánimu: sira moris iha fiar, hodi hein atu don futuro sira sai konkretu, ho matan hateke ba pátria definitiva.

## **EVANJELLU – Lc 12,32-48**

Ita kontinua halo "dalan ba Jerusalém". Oras-ne'e, Jezús dirije ho modu esplísitu ba grupu eskolante sira nian (hanaran "bibi-luhan ki'ik: kf. Lc 12,32). Iha katekeze anteriór sira, Jezús ko'alia kona-ba kore-an husi soin rai nian (kf. Lc 12,13-21) no kona-ba abandonu iha Maromak nia liman (kf. Lc 12,22-34); oras-ne'e, Jezús hatudu sá mak nesesáriu atu halo atu "Reinu" sai realidade ida presente nafatin iha eskolante sira nia moris no atu "soin sira" mundu ne'e nian la sai nu'udar prioridade: sai vijilante nafatin, hodi hein Na'i ne'ebé mai. Iha realidade, Lucas tau hamutuk iha-ne'e ai-kanoik ruma ne'ebé mai husi kontestu lahanesan; maibé liga malu ho tema vijilánsia (nenon-na'in) nian.

### *MENSAJEN*

Ita-nia testu hahú ho referénsia ba "rikusoin loos: ne'ebé eskolante sira tenke buka no la'ós soin sira mundu ne'e nian (vers. 33-34): "Reinu" no ninia valór sira. Kestaun fundamentál mak: oinsá deskobre no rai "rikusoin" ida-ne'e? Resposta haktuir ho kuadru tolu eh "ai-kanoik" sira ne'ebé bolu ita ba vijilánsia.

Ai-kanoik dahuluk (vers. 35-38) konvida atu kesi futu-kabun iha knotak no iha ahi-oan lakan nafatin (liga ho Ex 12,11 no kalan Páskua dahuluk, molok viajen bá liberdade), nu'udar ema sira ne'ebé hein Na'i ne'ebé fila husi festa kazamentu nian. Fiar-na'in sira, simu konvite atu sai preparadu atu simu libertasaun ne'ebé Jezús lori mai no lori sira sai husi rai moris-atan nian bá rai liberdade nian; konvida mós atu simu "noivu" (Jezús) ne'ebé mai propoin ba "noiva" (ema sira) komuñau nakonu ho Maromak (alianza foun, ne'ebé teolojia judaika apresenta liuhusi ilas kazamentu nian).

Ai-kanoik daruak (vers. 39-40) hatudu kona-ba inserteza oras atu Na'i to'o mai. Imajen na'ok-teen nian ne'ebé mai iha oras naran de'it, ne'ebé ema la hein, oinseluk uitoan, maibé di'ak atu hatudu oinsá eskolante fiél tenke prepara an nafatin, iha oras no sirkunstánsia naran de'it, atu simu Na'i.

Ai-kanoik datoluk (vers. 41-48) dirje ba reponsavel sira comunidade nian. Iha Jezús nia liafuan, ai-kanoik ne'e mak krítika ida ba responsavel sira Povu Israel nian; maibé, iha Lucas nia interpretasaun, ai-kanoik sirije ba animadór sira comunidade sarani nian, ne'ebé tenke permanese fiél iha sira-nia knaar animasaun no servisu nian: se sira ruma la halo tuir sira-nia reponsabilidade iha servisu ba maun-alin sira no uza funsaun ne'ebé entrega ba sira ho forma neglijente no laloos eh buka benefísiu ba an rasik, sei hetan kastigu. Versíkulu rua ikus

nian, hatudu kastigu lahanesan tuir tipu dezobediénsia nian: sira ne'ebé dezobedese ho intensaun sei hetan kastigu todan; sira ne'ebé dezobedese laho intensaun hetan kastigu uitoan. Liafuan sira iha testu ohin nian subliña responsabilidade boot ema sira ho funsaun responsabilidade nian iha Kreda.... Afirmasaun ikus ("sé mak simu barak sei husu barak husi nia...-vers. 48 b) dirije ba responsavel sira komunidadade nian; maibé aplika mós ba ema hotu ne'ebé simu don materiál no espirituál sira.